

春

秋

傳

春秋傳卷六

滋陽牛運震學

文公

元年春王正月公卽位

雖未葬稱公踰年也踰年何以卽位稱公國不可曠年
無君也

二月癸亥日有食之

公羊曰土
有朔字

天王使叔服來會葬

天子使大夫葬諸侯禮也

夏四月丁巳葬我君僖公

天王使毛伯來錫公命

錫命者錫之策命也何以書王命也然則無譏乎曰未
畢喪而錫命非正也

按錫命之典有以始立而錫命者有以有功而錫命者
有以既沒而錫命者蓋皆有敕告之文若蔡仲之命文
侯之命是也先儒以爲命爲諸侯或以爲錫之命服或
以爲錫之命圭錫命之禮固宜有此但經文不可詳考
不必臆指爾

晉侯伐衛

伐衛書爵予之爲其能脩霸業也

叔孫得臣如京師

拜錫命也在喪使臣可也

衛人伐晉

衛伐晉人貶之也貶衛所以予晉也

秋公孫敖會晉侯于戚

此內大夫始特會諸侯也外大夫會我君貶稱人內大夫會他諸侯不貶者貶已見於外也

冬十月丁未楚世子商臣弒其君頹

頹公穀作髡

此弒君兼弒父也言世子有父之親言君有君之尊也

公孫敖如齊

卽位而聘且圖婚於齊也

二年春王二月甲子晉侯及秦師戰于彭衙秦師敗績

此秦人伐晉也書敗不書伐惡秦之以忿取敗也戰而言及者主之也此秦伐晉而以晉侯主之者以晉侯爲志乎此戰也

丁丑作僖公主

作僖公主何以書譏後也凡君薨卒哭而祔祔而作主
僖公之薨於是十有五月矣始作主緩書之爲躋僖公
起端也

三月乙巳及晉處父盟

此公與處父盟也沒公爲公諱也處父不稱氏惡其以
大夫敵君也不地於晉也不書公如晉諱之也

夏六月公孫敖會宋公陳侯鄭伯晉士穀盟于垂隴

盟未有外大夫別會諸侯者垂隴之盟譏政在大夫也
士穀主盟曷爲序於諸侯之下春秋不以大夫主諸侯

也

自十有二月不雨至于秋七月

歷時而言不雨文無志乎雨也不言旱旱可知也不雨至于秋七月則八月雨矣不書以文無志乎雨略之也八月丁卯大事于大廟躋僖公

大事者何大祫也言大與有事異也躋僖公逆祀也僖之繼閔世統之正也臣不可以先君猶子不可以先父躋僖公非禮也

按閔僖昭穆之辨先儒紛紛不一或云閔僖各自爲世

此三傳之說也韋昭范甯孫覺胡安國趙鵬飛皆主之
或云閔僖兄弟不得爲父子逆祀只是位次之逆不以
爲昭穆之異此杜預之說也孫抃家鉉翁汪克寬皆宗
之孔穎達用晉賀循之議謂兄弟同代當同堂異室若
兄弟相代卽異昭穆設令兄弟四人皆立則祖父之廟
卽已從毀禮必不然其言甚辨西河毛奇齡云廟次與
世次不同世次以倫敘言而入廟之次則一以傳位之
先後準之國語云工史書世世卽世次如曹爲文昭晉
爲武穆是也又宗祝書昭穆昭穆卽廟次如懿王姪而

孝王叔則孝之嗣懿姪昭叔穆平王祖而桓王孫則桓之嗣平祖昭孫穆是也夫昭穆者父子之別名而祖禰者宗廟之定位以世次言閔僖本屬兄弟以廟次言閔僖雖不得有父子之稱而實當父子之序閔昭僖穆閔祖僖禰固有截然不可紊者三傳之說確有可考若謂兄弟相代不爲昭穆因而晉則景文同廟唐則中睿皆處昭位此皆後世變禮之謬夫同堂異室則一廟不可二主若各立一廟則廟制本有定數非可變易增置如謂兄弟四人皆立則祖父之廟卽已從毀夫親盡則祧

祖父之廟本有必毀之時卽令兄弟四人皆立世窮從毀亦無如何者且事極其變安知不別有權宜之制豈可執其變以駁其常邪然則兄弟相代雖讀祝告廟自有先君嗣君之稱不得爲父子而昭穆之廟次則無可疑者說春秋者守三傳及韋昭以來諸儒之說而折其中可也毛氏奇齡以大事爲吉禘按閔二年書吉禘此曰大事則非吉禘可知也吉禘是喪畢特舉之祭書吉禘于莊公專祭莊公也此曰大事是太廟大禘之祭於禘焉躋僖公也文公未大禘而大事于大廟亦非禮也

冬晉人宋人陳人鄭人伐秦

報彭衙之役也大夫不序稱人爲其脩怨貶之也

公子遂如齊納幣

喪未畢而納幣非禮也

三年春王正月叔孫得臣會晉人宋人陳人衛人鄭人伐

沈沈潰

伐沈以其服於楚也諸侯不忍楚之暴而伐其所與之
小國以爲諸侯失所伐矣大夫不序而書人貶之也

夏五月王子虎卒

王子虎者王叔文公也書其親不書其爵貴之也王子虎劉卷書卒錄賢也

秦人伐晉

此秦伯也曷爲稱人王官之役晉師不出秦猶逞兵以尋怨焉

秋楚人圍江

楚復圖諸侯也

雨蝨于宋

記災也蝨自上而下衆多如雨

冬公如晉

十有二月己巳公及晉侯盟

晉人請改盟也書曰及晉侯盟釋處父盟公之恥也

晉陽處父帥師伐楚以救江

公穀無以字

大夫帥師略之稱人此書陽處父帥師予之也凡救者皆善之伐楚以救江攻其所必救又救之善者也

四年春公至自晉

自是公朝大國皆書至著其勤於事疆也

夏逆婦姜于齊

孰逆之公自逆也曷爲不稱夫人公自逆故不稱夫人
婦者有姑之辭也不稱氏省文也稱婦姜不必稱婦姜
氏也不書略之也

穀梁以婦爲有姑之辭又以爲禮成于齊按宣元年遂
以夫人婦姜至自齊成十四年僑如以夫人婦姜至自
齊以爲有姑之辭則皆得之以爲禮成于齊則不可通
矣先儒又以去氏爲貶夫婦人有從人之義卽禮成于
齊亦不應貶及夫人彼宣元年成十四年婦姜皆不稱
氏又曷爲而貶邪

狄侵齊

秋楚人滅江

晉不能復救霸業之衰也

晉侯伐秦

報王官之役也

衛侯使甯俞來聘

冬十有一月壬寅夫人風氏薨

夫人者莊之妾僖之母也妾母何以稱夫人母以子貴
故正其爲夫人也

以妾僭嫡春秋之所惡也以子尊母則春秋不得而奪之春秋書妾母正其爲夫人者四一成風一敬嬴一定姒一齊歸皆先書夫人某氏後書葬我小君某氏正名定分前後一例並無異詞蓋子以母貴母亦以子貴適夫人在則喪葬諸禮以厭而降適夫人薨則祔姑反哭成喪無不如夫人之禮此春秋所以正其爲夫人也成風者僖公之母在文公爲妾祖母其薨也適夫人哀姜已前死則此稱夫人後此書葬於禮爲宜不然聖人豈以僭分悖倫之事屢書不一書於經而並無貶詞邪後

世諸儒紛紛爭論至爲卑其身則失位賤其父則無本之議亦見其考禮之不詳而持議之已苛矣

五年春王正月王使榮叔歸含且贈

其言歸含且贈者兼之也天子有贈送諸侯小君之禮王不稱天史文有詳略爾

三月辛亥葬我小君成風

王使召伯來會葬

數作毛伯

夏公孫敖如晉

秦人入郟

秦入郟以其貳於楚也書人貶之

秋楚人滅六

秦楚肆惡侵滅小國傷中國之無霸也

冬十月甲申許男業卒

六年春葬許僖公

不月略之也

夏季孫行父如陳

秋季孫行父如晉

八月乙亥晉侯驩卒

驩公作謹

冬十月公子遂如晉

葬晉襄公

三月而葬速自此以後晉君之葬皆三月

晉殺其大夫陽處父

此狐射姑殺之也其稱國以殺何譏在君也襄公已葬則曷爲譏曰君漏言而殺之處父之死則有由矣以是爲累君也

晉狐射姑出奔狄

射殺
作夜

狐射姑曷爲出奔書出奔則處父之爲射姑殺可知也

閏月不告月猶朝于廟

告月者告朔也天子頒朔于諸侯諸侯藏諸祖廟月朔則朝于廟告而受以行之閏月不告月非禮也猶朝于廟幸之也以爲禮之不盡己者有此爾孔子曰我愛其禮

七年春公伐邾

公作邾婁

爲其滅須句也

三月甲戌取須句

公作朋

須句不繫邾從上文也僖二十二年伐邾取須句矣此

何以再書取前取之而還其君也亡何而邾又伐而有之矣於是乎復取之此春秋兩書之而事自見者也

遂城郛

備邾也遂者因伐邾之師也

夏四月宋公王臣卒

穀作王臣

宋人殺其大夫

稱人以殺淑辭也大夫不名略之也義繫於殺大夫其名可略焉爾

戊子晉人及秦人戰于令狐晉先蔑奔秦

公羊蔑作昧奔上有以師字

秦晉何以俱書人秦納不正晉求君子秦而拒之兩有罪也此晉敗秦也書晉及而不言敗甚晉罪也先蔑奔秦不言出在外也或曰先蔑無罪故不例之於出也

狄侵我西鄙

秋八月公會諸侯晉大夫盟于扈

盟于扈晉侯立故也凡稱諸侯皆前目而後凡扈之盟非一役再有事則曷爲不序中國無伯大夫主盟略之以爲不足序焉爾趙盾不名而書大夫讓在大夫也且不以一大夫主諸侯書之若叔大夫者然

冬徐伐莒

公孫敖如莒泣盟

泣公毅作甚

復脩泚之盟協謀以備徐也

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

大夫會盟于王畿大夫專也

乙酉公子遂會雒戎盟于暴

雒公作伊雒

壬午乙酉相去四日爾不書遂者以二事出也再書日再稱公子所以謹華夷別內外也

公孫拔如京師不至而復丙戌奔莒

公羊無而字

如京師弔天王之喪也不至則曷爲不言所至舉京師以爲重不至則所至不足言也曷爲或言乃復或言而復乃難乎而也以爲教無意乎京師爲志乎奔莒也不言出自外也

蝨公作

宋人殺其大夫司馬

宋司城來奔

大夫言階也司馬司城者官也司馬者何公子卬也司城者何蕩意諸也曷爲書官司馬有典兵之任而見殺是宋公無司馬也司城有扞禦之職而來奔是宋公無司城也爲司馬者擢節以死爲司城者效節以出是其官猶可錄焉書官爲宋重之也然則何以不名稱國以殺罪累上也稱人以殺殺有罪也司馬之殺以圖無政不以有罪稱官不名別有罪也出奔有罪則名司城不名亦別有罪也且書官則以官重以官重則名可略焉

爾司馬書大夫司城何以不書大夫曰無罪而來奔存其官而已足不得與死節者並也

按宋司馬司城略名書官春秋之變例穀梁曰以其官稱無君之辭也劉敞以爲言不能其官程子云王者之後得自命官故獨書官說皆迂曲悉與經旨不合

九年春毛伯來求金

求金猶求賻也書求金者甚之也不書王命當喪未君也

夫人姜氏如齊

歸寧也

二月叔孫得臣如京師

辛丑葬襄王

卿共葬非禮也猶愈於莫往也

晉人殺其大夫先都

稱人以殺殺有罪也曰大夫惡專殺也

三月夫人姜氏至自齊

書至以得禮也書至以著不至者之爲非正也

晉人殺其大夫士穀及箕鄭父

其言及箕鄭父何以罪及之也書及則其罪有分也

楚人伐鄭

公子遂會晉人宋人衛人許人救鄭

此大夫帥師何以不序貶之也曷爲貶爲緩於救鄭也

夏狄侵齊

書狄之橫以病晉也

秋八月曹伯襄卒

九月癸酉地震

記異也

劉紹攷曰不書震於某者蓋魯地四五百里之間無所用其區別也

冬楚子使椒來聘

椒穀作荻

來聘書爵從禮制也前書荆人來聘楚始通中國略之也此書楚子書椒楚浸強而習交於諸侯書其實也

按楚以禮交於我如諸侯來聘之例而書之非褒之也公羊以爲善果而後進先儒謂春秋予其慕義皆非是秦人來歸僖公成風之祿

稱人來者微也稱僖公成風雖母子猶先君後夫人也

不言及成風子不可及母也成風不稱夫人非薨非葬
正名之義不繫於此故不必盡其稱且連僖公稱夫人
嫌其爲僖公之夫人也

葬曹共公

十年春王三月辛卯臧孫辰卒

夏秦伐晉

秦以國舉略之也略之者貶之也秦晉之曲直未有定
也則曷爲貶之晉主中夏之盟舍秦無加兵於晉者也
秦附楚以難晉晉疲於秦而楚逞志於南服晉之失伯

秦爲之也此春秋所以黜秦也

楚殺其大夫宜申

稱國以殺罪累上也傳稱宜申謀弑君焉然以國殺則殺之不以其罪也或曰宜申信有罪矣而商臣有弑君之惡故不以討賊之義予之也

自正月不雨至于秋七月

及蘇子盟于女栗

王新立故也孰及之公也何以沒公諱獨與內大夫盟也不書使而書及爲王諱也

冬狄侵宋

楚子蔡侯次于厥貉

厥公作屈

書次將伐宋而不行也楚書僭君親帥師書其實以著其橫用以見中國之無伯也

十有一年春楚子伐麋

麋公作圖

厥貉之會麋子逃歸故也

夏叔仲彭生會晉郤缺于承筐

公穀無仲字僅作匡

謀從楚之諸侯也

秋曹伯來朝

公子遂如宋

狄侵齊

冬十月甲午叔孫得臣敗狄于鹹

不言戰內勝不言戰也不言帥師將尊而師少也獲長狄僖如不書敗則獲矣舉其大者也

十有二年春王正月邾伯來奔

邾公作盛

邾以莊八年降於齊則邾齊之附庸也何以稱伯存其本爵也不書名爲其迫於齊而來奔閔之也

按左傳邾太子以夫鍾與邾邽來奔公以諸侯逆之故

晉曰邲伯若然則竊地之臣子而予之以爵君在而世子擅其位而予之以君之尊稱是獎亂也烏在春秋爲正名之書邪以是知此實邲伯來奔非邲太子也

杞伯來朝

二月庚子子叔姬卒

此未適人何以卒許嫁也其稱子何周人字積叔故或加子以自異也左氏以爲子叔姬已歸杞爲出而見絕者非也

夏楚人圍巢

春秋左傳卷之六
二
名山堂
秋滕子來朝

秦伯使術來聘

術公作遂

冬十有二月戊午晉人秦人戰于河曲

秦晉何以皆稱人自穀至此秦晉六交兵矣脩怨逞殘故皆貶而人之不言及者凡戰皆以主人及客秦曲尤甚故不言晉及也不言師敗績交綏而退敵也

季孫行父帥師城諸及鄆

鄆公作運

城未有言帥師者帥師而城畏莒也

十有三年春王正月

夏五月壬午陳侯朔卒

邾子貜荅卒

邾荅皆從竹公際從竹

自正月不雨至于秋七月

世室屋壞

世左穀作大

世室魯公之廟也書壞譏久不脩也

冬公如晉

衛侯會公子沓

公羊會下無公字

求通晉也晉會公要公而就之也

狄侵衛

十有二月己丑公及晉侯盟

公還自晉

公穀無
公字

鄭伯會公子斐

斐公
作斐

亦因公講平于晉也公一出而鄭衛二公附晉備書之善之也

十有四年春王正月公至自晉

春初始反以久書至

邾人伐我南鄙

叔彭生帥師伐邾

此卽叔仲彭生也脫仲字爾

夏五月乙亥齊侯潘卒

六月公會宋公陳侯衛侯鄭伯許男曹伯晉趙盾癸酉同盟于新城

扈之盟不序諸侯此其復序何諸夏之志也晉伯不振楚勢方張中國有蠶食之禍新城之盟諸侯猶有同欲焉趙盾以大夫合諸侯實有補於中國書曰同盟予之也

秋七月有星孛入于北斗

有星非常星也既見而移入北斗異之大者也

公至自會

晉人納捷菑于邾弗克納

捷公作接

書人者貶之也書弗克納善之也貶之者責其不審於義也善之者大其能克於義也捷菑邾公子晉出也何以弗克納捷菑不正也

九月甲申公孫敖卒于齊

奔大夫不書卒此其書卒何也爲受其喪不可不錄其卒也書卒于齊則敖之自莒奔齊可知也

齊公子商人弑其君舍

舍未踰年其曰君何也所以正商人弑君之罪也君未踰年稱子緣人子之心而爲之稱弑未踰年稱君緣臣民之義以正其名

宋子哀來奔

奔大夫名此其不名何別於有罪而見出於其君者也

冬單伯如齊

唁叔姬也

齊人執單伯

齊人執于叔姬

叔姬魯女舍之母也不齊夫人從內稱也齊稱人貶之也弑逆之賊執其君母以及諸侯之使王法絕矣兩書齊人重其罪故殊書之又不可以臣及君夫人也

按單伯如齊唁叔姬也唁叔姬則齊人何爲執之蓋單伯詢舍見弑之由而叔姬質之此單伯叔姬所以併執也左傳以爲齊執天子之使公穀以爲單伯叔姬道淫皆非也

十有五年春季孫行父如晉

爲單伯與子叔姬故也

三月宋司馬華孫來盟

此華耦也何以書華孫貴之也書官能其官也書來盟不言使盟在華孫也宋公無道華孫以權來盟睦鄰脩好以紓國難是以善之也

夏曹伯來朝

齊人歸公孫敖之喪

大夫喪還不書此何以書書歸之者以著受之者之非禮也不言來無特使也不言至自齊別於君及夫人也

六月辛丑朔日有食之鼓用牲于社

單伯至自齊

大夫歸不書至執而反則書至係國體也

晉卻缺帥師伐蔡戊申入蔡

入不言伐此其言伐何晉有辭也新城之盟蔡不與以是爲宜討也

秋齊人侵我西鄙

弑逆之賊又怙惡以伐人國書人貶之

季孫行父如晉

告齊侵也

冬十有一月諸侯盟于扈

盟于扈謀伐齊也何以不序受賂而止廢討獎亂不足序也何以不書晉會諸侯削晉伯也

有二月齊人來歸子叔姬

齊人者亂辭也其言來歸何絕也稱人以歸歸無罪也不言齊子叔姬來歸而言齊人來歸子叔姬譏在齊也齊侯侵我西鄙遂伐曹入其郛

齊侯侵我謂諸侯不能也遂伐曹入其郛討其來朝也

於是齊商人之無忌甚矣蓋夷然有抗晉長諸侯之心焉凡一役而再有事不悉書此其悉書之何齊始敗夏盟也書魯所以著齊之橫而病晉也

十有六年春季孫行父會齊侯于陽穀齊侯弗及盟

弗及盟者不與盟也曷爲不言不與盟諱之使若齊侯有故不及於盟者然

夏五月公四不視朔

公何以不視朔公有疾也何以不書有疾公非實有疾也

六月戊辰公子遂及齊侯盟于鄆邱

鄆公作屏
穀作師

復行父之盟也

秋八月辛未夫人姜氏薨

毀泉臺

何以書重勞民且彰先君之過也

楚人秦人巴人滅庸

滅國書人貶之也先楚楚主兵也

冬十有一月宋人弑其君杵臼

公作處曰

弑君書人非一人之辭也以爲國人咸有罪爾蕩意諸

死不書以意諸不得班於仇牧孔父之義略之也

十有七年春晉人衛人陳人鄭人伐宋

大夫稱人興討賊之師而成其亂貶之也

劉紹攸曰啖氏謂不命之卿例書人非貶按十五年晉卻缺帥師伐蔡豈其命卿邪或者又謂釋賊之罪當貶於釋賊不討之日不當貶於帥師討賊之時不知是時政在大夫釋賊者諸卿也卽會扈之諸侯亦爲諸卿所脅而中止大夫稱人而諸侯不序貶之之義乃著矣先儒之說是也

夏四月癸亥葬我小君聲姜

聲公作聖

九月而葬慢也別作諡非禮也

齊侯伐我西鄙

以魯專事晉也

六月癸未公及齊侯盟于穀

諸侯會于扈

諸侯何以不序不足序也其不序奈何欲治宋而後不能也

秋公至自穀

書至爲會齊商人難之也

冬公子遂如齊

拜穀盟也

十有八年春王二月丁丑公薨于臺下

臺下非正也

秦伯罅卒

夏五月戊戌齊人弑其君商人

此郈歇閻職也曷爲以齊人言之商人者非二人之所
能弑也因齊人爾是以稱人以弑之也商人何以稱君

齊已成之爲君也

六月癸酉葬我君文公

秋公子遂叔孫得臣如齊

聘則曷爲二卿共使非常聘也其非常聘何公子遂將弑子赤而立宣公借叔孫假二事以請于齊春秋竝文書之著其邪謀於奉使之日也

冬十月子卒

子者孰謂子赤也何以稱子成之爲在喪之君也何以不名旣葬也凡君未葬稱子某旣葬稱子書卒不書弑

諱之也

夫人姜氏歸于齊

大歸也前書子卒繼書夫人歸于齊則知夫人之子沒於弑而不安於魯也

李光地曰夫人無罪不容於弑逆之人而去言孫非惡也言如則不還故取歸寧之歸爲義而變文以書之

季孫行父如齊

告宣公之立也議納賂以平焉則是與聞乎故也

莒弑其君庶其

稱國以弑殺弑君之辭也傳曰君無道也

按左傳以爲弑庶其者莒太子僕也果使莒僕弑君則
弑君而兼弑父矣春秋爲誅亂臣賊子而作曷爲不直
著其事而爲之諱邪且如左傳所云莒僕因國人以弑
紀公則僕何不自立而奔魯邪信傳不如信經凡若此
者悉當以經文爲斷

春秋傳卷之六終

蘭陵門人張魯文校刊

春秋傳卷七

滋陽牛運震學

宣公

元年春王正月公卽位

繼弒君不言卽位書卽位者忍於行卽位之禮也

公子遂如齊逆女

喪娶非禮也書公子遂如齊逆女譏有重於喪娶者也
三月遂以夫人婦姜至自齊

大夫不以夫人以夫人非正也書遂制在遂也遂何以

不稱公子一事而再見者卒名也其稱婦有姑之辭也
夏季孫行父如齊

拜婚且請會也於是行父佐篡之惡著矣

晉放其大夫胥甲父于衛

河曲之役撓與駢之謀者趙穿胥甲也趙盾當國舍穿而放甲以是爲失司馬之法矣稱國以放見晉政之在私門也不去官著其專也

公會齊侯于平州

求庇於齊也

公子遂如齊

拜齊成也詳錄之以著篡立之惡遂爲首謀也

六月齊人取濟西田

外取內邑不書此何以書賂齊也賂齊何言乎齊人取之諱也然則何以知爲賂齊比事書之而可見也

秋邾子來朝

楚子鄭人侵陳遂侵宋

人鄭罪其從楚也楚書爵而獨人鄭所以深罪鄭也書遂侵宋言志不在陳也

晉趙盾帥師救陳

凡書救者善之也不書救宋宋有弑君之罪矣以其不當救略之也

宋公陳侯衛侯曹伯會晉師于棐林伐鄭

棐公作斐

上書趙盾帥師而此書晉師其爲趙盾之師可知也靈公之會諸侯不序此趙盾之師也則其列諸侯以會之何嘉諸侯之卽晉抗楚猶能伸中國之大義也

冬晉趙穿帥師侵崇

崇公作柳

伐秦之與國以求成是謬計也書之以著趙穿之專兵

也

晉人宋人伐鄭

鄭未服也人之者貶之疾晉之偕宋以伐鄭以爲非伯者之師殆異乎裴林之役矣

二年春王二月壬子宋華元帥師及鄭公子歸生帥師戰于大棘宋師敗績獲宋華元

戰而曰及主之者也鄭伐宋而以宋主之被伐者爲主也不言伐以及戰見之也其將皆尊師皆衆故皆言帥師言獲言師敗績師與大夫等重也

秦師伐晉

報侵崇也。此在晉故秦稱師。

夏晉人宋人衛人陳人侵鄭。

曷爲稱人以罪晉也。爲宋報大棘之恥。畏楚而還。失伯者之義。故貶而人之。

秋九月乙丑晉趙盾弒其君夷皋。

皋公作獯

弒君者穿也。主弒者盾也。書曰趙盾弒其君。據其實而書之。誅首惡也。惡莫慘於意說春秋者。以爲趙盾實不弒君。與聞乎故而歸獄焉。非聖人之旨也。

冬十月乙亥天王崩

三年春王正月郊牛之口傷改卜牛牛死乃不郊

不言傷之者牛自傷也改卜牛又死變之甚也乃者言如是乃不郊爾不然郊矣言免牲不言不郊從可知也言牛死則須言不郊牛死得再卜也此不郊爾書之煩而不殺者以爲異乎常卜郊之不吉者也

猶三望

望以郊及不郊無望可也猶者通可以已也

葬匡王

春秋傳

卷七 宣公

四

空山堂

未滿七月而葬速

楚子伐陸渾之戎

陸公作賁後同穀無之字

夷狄相伐不書此何以書近王室也

夏楚人侵鄭

鄭卽晉故也書人書侵著楚之暴也

秋赤狄侵齊

宋師圍曹

報武氏之亂也書圍罪宋也

冬十月丙戌鄭伯蘭卒

葬鄭穆公

穆公作繆

葬速禮不備也

四年春王正月公及齊侯平莒及邾莒人不肯公伐莒取
向

平莒及邾義也挾強齊以要平非義也莒人不肯非有
罪也伐莒取向利之非君子之道也君子平國以禮不
以亂

秦伯稻卒

夏六月乙酉鄭公子歸生弑其君夷

謀弑君者宋也成其弑者歸生也書曰歸生弑其君權
在歸生也

赤狄侵齊

秋公如齊

公至自齊

書至著公之謹于事齊以自固也

冬楚子伐鄭

鄭未服也書爵著其強以恥中國之不振也

五年春公如齊

夏公至自齊

踰時始返也齊侯止公不書諱之也

秋九月齊高固來逆子叔姬

左無子字

諸侯嫁子於大夫主大夫以與之書來逆接內也著高固之亢又以罪宣公也

叔孫得臣卒

不日闕也

冬齊高固及子叔姬來

反馬也禮遣使反馬高固親來非禮也大夫非公事與

妻出境亦非禮也

楚人伐鄭

稱人貶之也惡其陵中國也

六年春晉趙盾衛孫免侵陳

陳及楚平故也

夏四月

秋八月螽

公作螽

冬十月

七年春衛侯使孫良夫來盟

謀會晉也書使前定也

夏公會齊侯伐萊

伐萊齊志乎利也會伐萊魯助之虐也

秋公至自伐萊

書至踰時且遠也

大旱

冬公會晉侯宋公衛侯鄭伯曹伯于黑壤

晉靈之會盟不序此其復序諸侯何也予成公之能合諸侯庶幾文襄之餘烈也書會不書盟爲公之不與盟

諱之也

八年春公至自會

書至以見公之止於晉踰年始返也

夏六月公子遂如齊至黃乃復

此有疾而復也曷爲不言有疾義不可言有疾也國君外如有疾而復禮也人臣不以生死壅君命以疾還非禮也

辛巳有事于大廟仲遂卒于垂壬午猶繹萬入去籥

有事者時饗之常禮也常祭不書以仲遂卒于祭之日

書之也稱仲遂者遂生而賜氏於其卒書氏以著世卿也卿卒不繹繹非禮也猶者可已而不已也萬者文武二舞之總名去籥去文也大夫卒去樂萬入去籥亦非禮也

戊子夫人嬴氏薨

公穀作熊氏

嬴氏文之賸宣之母也書夫人書薨成之爲夫人也

晉師白狄伐秦

殺之役書晉及姜戎此書晉師白狄而不書及累晉也

楚人滅舒蓼

公作舒鄧

秦晉構兵而楚得肆其暴也

秋七月甲子日有食之既

冬十月己丑葬我小君敬嬴

公穀作頃熊

雨不克葬庚寅日中而克葬

雨不克葬及葬而雨也禮庶人懸封而葬不爲雨止則諸侯之葬之爲雨止可知也次日卽葬喪無退也日中克葬猶得反虞也左氏以爲禮者是也

城平陽

城築之役必書重民力也

楚師伐陳

陳卽晉也書師書伐所以著楚之強而傷晉伯之不振也

九年春土正月公如齊

公有母之喪而朝齊非禮也

公至自齊

夏仲孫蔑如京師

王室徵聘故也不書徵聘者諱之也

胡安國曰歲首月公朝齊夏使大夫聘京師此皆比事

可攻不待貶絕而惡自見者也

齊侯伐萊

秋取根牟

內滅國曰取諱之也

八月滕子卒

不日不名略之也

九月晉侯宋公衛侯鄭伯曹伯會于扈

討不睦爲陳故也

晉荀林父帥師伐陳

陳侯不會荀林父帥師以伐之因上文其爲諸侯之師可知也

辛酉晉侯黑臀卒于扈

其地於外也不言卒于會會已畢不可言禮也

冬十月癸酉衛侯鄭卒

宋人圍滕

伐喪也貶而人之

楚子伐鄭

晉卻缺帥師救鄭

書救予之猶幸其能救鄭也

陳殺其大夫洩冶

洩公鞅
作泄

稱國以殺殺無罪也稱其官錄忠諫也

先儒多以書名爲責洩冶此不明於事君之忠亦不明於稱名之義也禮諸侯不生名死則名之則大夫之死而名之宜矣仇牧荀息春秋皆予之而皆書其名何疑於洩冶邪

十年春公如齊

公至自齊

書至以志公朝齊之數也

齊人歸我濟西田

歸田邑不言我此其言歸我何著其爲我田也猶曰取
諸我之懷而予之爾歸鄆謹龜陰之田歸謹及闡曷爲
不著其爲我曰善之也歸濟西田非善之也

夏四月丙辰日有食之

己巳齊侯元卒

齊崔氏出奔衛

書氏著其以族出也

春秋左傳卷之十一
公如齊

奔齊喪也

五月公至自齊

癸巳陳夏徵舒弑其君平國

六月宋師伐滕

宋間晉之不競而伐滕書之貶之也

公孫歸父如齊葬齊惠公

晉人宋人衛人曹人伐鄭

晉不能庇鄭而汲汲爭鄭稱人貶之也

秋天王使王季子來聘

王季子者何天子之母弟也其來聘答前年仲孫蔑之聘也

公孫歸父帥師伐邾取繹

釋公羊作繹

大水

季孫行父如齊

聘嗣君也

冬公孫歸父如齊

爲伐邾畏齊討也

齊侯使國佐來聘

報聘也齊侯在喪稱爵惡其以吉禮行也

饑

楚子伐鄭

晉士會救鄭不書以晉終不競於楚略之也

十有一年春王正月

夏楚子陳侯鄭伯盟于辰陵

穀作夷陵

盟于辰陵陳鄭服楚也書之閔中國之衰也

公孫歸父會齊人伐莒

稱齊人以示貶人齊所以人魯也

秋晉侯會狄于欒函

會狄服也書之以責晉之不務諸侯而汲汲於狄也

冬十月楚人殺陳夏徵舒

此入而後殺也不書入而先言殺予楚以討賊也書楚人責中國之不能也

十一月楚子入陳

殺而又書入不正楚子之入國也書楚子目其人以貶之也

納公孫寧儀行父子陳

寧公作甯

納者內弗受也二子導君於淫以致弑亡之禍宜爲陳人所不容而楚子納之是以討賊始而以納姦終也此而觀之楚子之功罪彰矣

十有二年春葬陳靈公

書葬賊已討也

劉紹攷曰傳例君弑賊不討不書葬蓋賊不討必不以禮葬其君安得而書葬徵舒旣爲楚討陳之臣子得以禮葬其君故得書葬

楚子圍鄭

不書入楚許鄭平也

夏六月乙卯晉荀林父帥師及楚子戰于邲晉師敗績

不書晉救鄭緩不及事也書及猶曰荀林父爲主乎此戰也先穀趙旃實敗晉師獨責林父者責帥也大夫不敵君此書荀林父以敵楚子者尊晉以抑楚也

秋七月

冬十有二月戊寅楚子滅蕭

蕭宋之附庸滅蕭以動宋也

晉人宋人衛人曹人同盟于清邱

晉爲楚敗而結諸侯也大夫不序以盟之無益略之也

宋師伐陳

衛人救陳

陳附楚者也宋以清邱之盟而伐之書師非惡之也衛救陳叛盟也書人非義之也

十有三年春齊師伐莒

莒公作衛

莒恃晉而不事齊故也

夏楚子伐宋

以其伐陳也書爵以著楚子之親蒞行閒而肆於用武也

秋螽

公作

冬晉殺其大夫先穀

穀殺
作穀

討邲之罪也逾年而始討則殺之不以其罪也稱國以殺而不去其官以爲晉失刑焉

十有四年春衛殺其大夫孔達

爲救陳故以說于晉也稱國以殺罪累上也

夏五月壬申曹伯壽卒

晉侯伐鄭

爲邲故也告於諸侯蒐焉而還則其書晉侯何嘉其稍能自強而以爲中國不可無伯也

秋九月楚子圍宋

伐宋未服繼之以圍書之以罪楚之暴責晉之不能救也

葬曹文公

冬公孫歸父會齊侯于穀

謀事楚也歸父以大夫抗諸侯齊侯屈君之尊而與大

夫會皆非禮也

十有五年春公孫歸父會楚子于宋

懼楚也書之以著魯之叛中國而從夷狄也

夏五月宋人及楚人平

外平不書有關於天下之故而後書宋及楚平南北之勢成矣書之傷中國之無伯幸宋之猶能與楚平也人之者平在大夫也

六月癸卯晉師滅赤狄潞氏以潞子嬰兒歸

此荀林父也曷爲略之稱師以晉人之釋楚而甘心於

羣狄也潞氏者赤狄之一種也稱子不絕其爵也

秦人伐晉

秦晉不交兵久矣此復伐晉者乘晉之略狄而闕其虛也故貶而人之

王札子殺召伯毛伯

兩下相殺不書此何以書王子殺卿士王無政也

秋

螽蝻公作

仲孫蔑會齊高固于無婁

公作牟婁

初稅畝

稅畝者何履畝而稅也藉而又稅藉取九一焉稅取什一焉其曰初者言自此始也何以書譏重斂也

冬蟻生

饑

十有六年春王正月晉人滅赤狄甲氏及留吁

此士會也曷爲稱人取之也盡狄而并其地非攘夷之道也稱及者所以別言二族也

夏成周宣榭火

榭公作榭火
公穀作災

宣榭者宣王之榭講武之屋也宣榭火何以書以王者

中興之迹之重書之也

按公羊以宣榭爲宣宮之榭何休因謂宣王中興其廟不毀胡氏又謂廟制似榭其說皆近傳會毛奇齡以爲宣廟不祧而遠廟無寢故名爲榭亦無的據杜預釋榭爲講武屋而孔穎達引楚語以證之蓋成周爲周之東都吉日車攻咏宣王講武之盛則宣榭爲宣王之榭有由來矣

秋郊伯姬來歸

來歸見出也內女見出書之以志變也始歸不出略之

也

冬大有年

何以書幸有年也

先儒皆以宣公不道不應有豐年之報謂之紀異夫君之不德民則何罪天何爲怒其君而移禍於民邪宣公之世稅重民困饑饉薦臻苟非大有則民靡孑遺矣書此所以閔魯民而幸之也何謂紀異哉

十有七年春王正月庚子許男錫我卒

丁未蔡侯申卒

夏葬許昭公

葬蔡文公

六月癸卯日有食之

己未公會晉侯衛侯曹伯邾子同盟于斷道

同外楚也書曰同盟幸其猶能同也或曰同謀齊也

秋公至自會

冬十有一月壬午公弟叔肸卒

其曰公弟貴之也稱字賢之也何賢乎叔肸宣弑而非之也非大夫不卒以叔肸之義合於春秋錄之也

十有八年春晉侯衛世子臧伐齊

為齊不與斷道之會故也晉侯稱爵曲在齊也衛世子書名譏其父在掌兵非子道也

公伐杞

為其不來朝也

夏四月

秋七月邾人戕郕子于郕

穀作繪

戕者挽而殺之也此邾子也其曰邾人者惡之也書于郕著邾之惡又以責郕之無臣子也

甲戌楚子旅卒

旅穀
作呂

何以不書葬吳楚之君不書葬辟其號也

公孫歸父如晉

欲援晉以去三桓也

冬十月壬戌公薨于路寢

歸父還自晉至筮遂奔齊

筮公穀
作榘

大夫還不至其曰還自晉何終事也奔不言出在外也
其奔何以季孫行父之遂之也

春秋傳卷之七終

蘭陵門人張魯文校刊